

## Риёзус солиҳийн шарҳи / Риёзус солиҳийн шарҳи / 111-ҳадис

111 - الثَّانِي عَشَرَ: عَنْ أَبِي فِرَاسٍ رَبِيعَةَ بْنِ كَعْبٍ الْأَسْلَمِيِّ خَادِمِ رَسُولِ اللَّهِ صَلَّى اللَّهُ عَلَيْهِ وَسَلَّمَ،  
وَمِنْ أَهْلِ الصُّفَّةِ رَضِيَ اللَّهُ عَنْهُمْ قَالَ: «كُنْتُ أُبَيْثُ مَعَ رَسُولِ اللَّهِ صَلَّى اللَّهُ عَلَيْهِ وَسَلَّمَ، فَأَتَيْهِ  
بِوَضُوئِهِ وَحَاجَّتِهِ، فَقَالَ: «سَلْنِي» فَقُلْتُ: أَسْأَلُكَ مُرَافَقَتَكَ فِي الْجَنَّةِ. فَقَالَ: «أَوْ غَيْرَ ذَلِكَ؟» قُلْتُ:  
هُوَ ذَلِكَ قَالَ: «فَأَعِنِّي عَلَى تَفْسِيكَ بِكَثْرَةِ السُّجُودِ» رَوَاهُ مُسْلِمٌ. [489].

111. Абу Фирос Рабийъа ибн Каъб ал-Асламий розияллоху анхудан ривоят қилинади:

(Бу киши Расулуллоҳ соллаллоху алайҳи васалламнинг ходимлари ҳамда аҳли суфталардан эдилар.)

«Расулуллоҳ соллаллоху алайҳи васаллам билан бирга тунаб қолар эдим. Бир куни у зотга таҳорат сувларини ва бошқа керакли нарсаларни олиб келган эдим, у зот менга: **«Сўра»**, дедилар. «Жаннатда сиз билан ҳамроҳ бўлишни сўрайман», дедим. **«Бундан бошқани эмасми?»** дедилар. «Шунинг ўзини», дедим. У зот: **«Унда кўп сажда қилиб, бунда менга ёрдамлашгин»**, дедилар».

*Имом Муслим ривояти.*

**Шарҳ:** Робийъа ибн Каъб ал-Асламий розияллоху анху Пайғамбаримиз соллаллоху алайҳи васаллам билан сафарда кечаси бирга қолган эдилар. Ўшанда у зотнинг хизматларини ихлос билан қилиб таҳорат суви, мисвок ёки жойнамозга ўхшаш ҳожат тушадиган нарсаларни келтирганлар. Пайғамбаримиз соллаллоху алайҳи васаллам у кишидан рози бўлиб, хоҳлаган нарсангни сўра, деганлар. Ана ўшанда Робийъа ибн Каъб ал-Асламий:

**«Жаннатда сизга рафиқ бўлишни сўрайман»**, деди.

У киши жуда катта нарсани, умуман ҳаётнинг асосий муддаосини сўраган эдилар. Расулуллоҳ соллаллоху алайҳи васаллам у кишининг нияти жиддийлигини билиш учун:

**«Бундан бошқани эмасми?» дедилар».**

Лекин Робийъа розияллоху анху жиддий эдилар:

**«Шунинг ўзини»**, дедилар.

**«Ундоқ бўлса, менга ўзинг учун кўп сажда ила ёрдам бер»**, дедилар Сарвари олам соллаллоху алайҳи васаллам.

Бу Пайғамбаримизнинг, мен сенинг жаннатда рафиқим бўлишинг учун кўлимдан келган ҳаракатни қиламан, аммо ўзинг ҳам бу ишда менга ёрдам бер, менга ёрдам беришинг, саждани кўп қилиш билан бўлсин, деганларидир.

Бундан жаннатга киришнинг энг асосий омиллари намоз ва ундаги саждалар экани билинади.

Ушбу ҳадис шарифдан олинадиган фойдалар:

1. Аҳли фазл кишиларнинг хизматида бўлиш фазилатли иш экани.
2. Улуғ кишиларга таҳорат суви ва шунга ўхшаш ҳожатлари тушиб турадиган нарсаларни муҳайё қилиб туриш кичикларнинг вазифаси экани.
3. Аҳли фазл кишилар ўзларини рози қилган атбоъларига мурувват этиб туришлари.
4. Сўраганида охират саодатини сўраш кераклиги.
5. Биров бир нарсани сўраганида: «Бундан бошқани эмасми?» деб сўраш жоизлиги.
6. Пайғамбаримиз соллаллоху алайҳи васаллам ҳам ўзлари бевосита, амал қилмаган одамнинг жаннатга киришига бўлишига сабаб бўлмасликлари.
7. Намознинг фазилати катта бўлиб, жаннатга кириш учун зарур амал экани.
8. Робийъа ибн Каъб розияллоху анхунинг фазилатлари.

Демак, иложи борича кўп намоз ўқиб, саждани кўпайтиришимиз лозим. Ана шунда жаннатдан ва ундаги олий мартабалардан умидвор бўлсак ярашади.



HADIS.ISLOM.UZ  
NUBUVVAT MARVARIDLARI